

近溪羅先生一貫編

近溪羅先生一貫編

門人熊 儼孺夫編

後學錢啓忠沃心重

四書總論

問讀語孟學庸要義羅子曰好古以時習聖神信性  
以善克愛敬運矩以身聯家國畏命以心一天人  
問大學之首知止中庸之重知天知人而論語却言  
吾有知乎哉無知也博觀經書言知處甚多而不  
識不知惟詩則一言之然未有若夫子直言無知

之明決者。請問其旨。羅子曰。吾人之學。專在盡心。而心之爲心。專在明覺。如今日會堂。百十其衆。誰不曉得相見。曉得坐立。曉得問答。曉得思量。此個明覺曉得。卽是本心。此個本心。亦只是明覺曉得而已。事物無小大之分。時候無久暫之間。真是徹天徹地。而貫古貫今也。但此個明覺曉得。其體之涵諸心也。最爲精妙。其用之應于感也。又極神靈。事之旣至。則顯諸仁。而昭然若常自知矣。事之未來。則藏諸用。而茫然渾然。知若全無矣。非知之果。

無也。心境漸寂而覺照無自而起也。譬則身之五官口可閉而不言。目可閉而不視。惟鼻孔無閉。香來卽知嗅之。其知實常在也。耳孔無閉。聲來卽知聽之。其知亦實常在也。然嗅之知也。必須香來始出。時或無香。便無嗅之知矣。聽之知也。必須聲來始出。時或無聲。便無聽之知矣。孔子當鄙夫之未問。却真如音未臨乎耳。香未接乎鼻。安得不謂其空空而無知耶。及鄙夫旣問。則其事其物。兩端具在。亦卽如音之遠近。從耳聽以區分。香之美惡。從

鼻嗅以辨別。鄙夫之兩端。不亦從吾心之所知。以叩且竭之也哉。但學者須要識得聖人此論。原不爲鄙夫之問。而只爲明此心之體。蓋吾心之能知。人人皆認得。亦人人皆說得。至心體之無知。則人人皆認不得。人人皆說不得。天下古今之人。只緣此處認不真。使心之知也。常無主宰。而雜擾以至喪真。只緣此處說不出。便言之立也。多無根據。而支離以至畔道。若上智之資。深造之力。一聞此語。則當下知體。卽自澄徹。物感亦自融通。所謂無知。

而無不知。而天下之真知在我矣。噫。聖人於此。寧非苦心之極也哉。

問讀論語何如。羅子曰。論語一書。直是難讀。芳初讀時。苦其淡。然無味。殊覺厭人。稍長。從事孝弟。乃喜其一二條。契合本心。然往往以近易目之。後養病家居。因究心書易。至堯舜二典。乾坤二卦。間有悟處。乃通身汗浹。始知天生孔孟。爲萬世人定魂魄。立性命。從之則生。違之則死也。自此以後。非語孟二書。輒厭人目。以至蒞官中外。隨所施措。自然翕

順愈久而愈益簡要愈益精純也。若戰國而下諸公。真是用心徒勞。而去道彌遠。敝至今日。可勝嘆哉。

問先儒尋孔顏樂處。所樂何事。羅子曰。孔顏之樂。雖未易知。而孔顏之言。行則具在也。竊意此樂有自本體而得。則生意忻忻。赤子愛悅親長處是也。有自用功而得。則天機感觸。理義之悅我心是也。曰。此樂處某說。要人欲爭盡。天理流行處。方是。曰。子之論固是。但先後却欠分曉。譬如導泉然。須先覓

得源頭着了。方掘去沙泥。以遂其流。不然其沙泥徒掘。泉終無流。又安得樂耶。

問孔門恕以求仁。先生如何致力。羅子曰。芳自知學。卽泛觀。垂魚愛其羣。隊戀如。以及禽鳥之上下。牛羊之出入。形影相依。悲鳴相應。渾融無少間隔。輒惻然思曰。何歟于人。而異之。後偶因遠行。路逢客侶。相見卽忻。忻談笑終日。疲倦俱忘。竟亦不知其姓名。別去。又輒惻然思曰。何獨于親戚骨肉而異之。噫。是動于利害。私于有我焉耳。從此痛自刻責。



善則歸人。過則歸己。益則歸人。損則歸己。久漸純熟。不惟有我之私。不作間隔。而家國天下。翕然孚通。甚至毫髮不欲自愛。而念念以利濟爲急焉。三十年。覺恕之一字。得力獨多也。

問今日用功當何下手。羅子曰。孔子十五而志于學。亦自其志之始而言之。其後立與不惑。只是此志真切。而愈精愈純焉耳。故志與學。原非兩事。亦無間歇時也。今日之急務。未立志者。須先嚴辨。已立志者。須更勇猛。若果早夜精進。卽便是至誠無息。

亦卽是孔門求仁。卽是集義有事不忘。卽是靜卽是敬。卽是致其良知。而聖賢學問。更無不對。同亦何憂不得手也。

問掃盡浮雲。而見青天白日。與孔孟宗旨同否。羅子曰。語孟具在。如曰苟志于仁矣。無惡也。又曰我欲仁。斯仁至矣。又曰凡有四端于我者。知皆擴而克之。若火之始燃。泉之始達。苟能克之。足以保四海。看他受用。渾是青天白日。何等簡易。何等方便也。曰。如是何人。人不孔孟耶。曰。此則由於習染太深。

聞見混雜。雖有志向學者。亦莫可下手也。曰此等習染聞見。難說不是天日的浮雲也。故今日學者。須要如磨鏡子樣。將塵垢決去。方是光明顯現也。曰觀之孟子。謂知皆擴克。卽一知字。果是要光明顯現。但吾心覺悟的光明。與鏡面光明。却有不同。何則。鏡面光明。與塵垢原是兩個。吾心先迷後覺。却是一個。當其覺時。卽迷心爲覺。則當其迷時。亦卽覺心爲迷也。夫除覺之外。更無所謂迷。而除迷之外。亦更無所謂覺也。故浮雲天日。塵埃鏡光。俱

不足爲喻。若必欲尋個譬喻。莫如卽個冰之與水。猶爲近也。若吾人閒居放肆。一切利欲愁苦。卽是心迷。譬則水之遇寒凍而凝結成冰。固滯蒙昧。勢所必至。有時共師友講論。胷次瀟灑。卽是心開朗。譬則冰之遇煖氣消融而解釋成水。清瑩活動。亦勢所必至也。况冰雖凝而水體無殊。覺雖迷而心體具在。方是良知宗旨。真是貫古今。徹聖愚。通天地萬物。而無二無息。孔孟之功。真是爲天地立心。爲生民立命。而開太平於萬萬世也。

問吾儒之學其大如此然必有所以大處不知何以  
見得羅子曰聖賢之道原從心上覺悟故其機自  
有不容已否則矯飾而爲之又安能可久可大而  
成天下萬世之德業也耶孟子曰萬物皆備於我  
反身而誠樂莫大焉蓋反求此身本有真體非意  
見方所得而限量潛於天地萬物之中而超於天  
地萬物之外渾然共成一個千古萬古更無能間  
隔之者却非皆備於我而何哉程子謂認得是我  
何所不至若以己合彼則猶是有二又安得樂抑

又安能聯屬天下國家以成其身也耶

問吾儕爲學此心常有茫蕩之時須是有個工夫作得主張方好羅子曰據汝所云是要心中常常用一工夫自早至晚更不忘記也耶曰正是如此曰聖賢言學必有個頭腦頭腦者乃吾心性命而得之天者也若初先不明頭腦而只任爾我潦草之見或書本膚淺之言胡亂便去做工夫此亦儘爲有志但頭腦未明則所謂工夫只是汝我一念意思爾旣爲意念則有時而起便有時而滅有時而

聚。便有。時。而。散。有。時。而。明。便有。時。而。昏。縱。使。專。心。  
記。想。着。力。守。住。畢。竟。難。以。長。久。况。汝。心。原。是。活。物。  
且。神。物。也。持。之。愈。急。則。失。愈。速。矣。曰。弟。子。所。用。工。  
夫。也。是。要。如。大。學。中。庸。所。謂。慎。獨。不。是。學。問。一。大。  
頭。腦。也。曰。聖。人。原。日。教。人。慎。獨。本。自。有。頭。腦。而。爾。  
輩。實。未。見。得。蓋。獨。是。靈。明。之。知。而。此。心。本。體。也。此。  
心。徹。首。徹。尾。徹。內。徹。外。更。無。他。有。只。一。靈。知。故。謂。  
之。獨。也。中。庸。形。容。謂。其。至。隱。而。至。見。至。微。而。至。顯。  
卽。天。之。明。命。而。日。監。在。茲。者。也。慎。則。敬。畏。周。旋。而。

常目在之。顧謂天之明命者也。如此用功。則獨便是爲慎的頭腦。慎亦便以獨作主張。慎或有時勤。怠。獨則長。知而無勤。怠也。慎或有時作輟。獨則長。知而無作輟也。何則。人無所不至。惟天不容僞。慎獨之功。原起自人。而獨知之知。原命自天也。况汝輩工夫。當其茫蕩之時。雖說已是怠而忘勤。已是輟而廢作。然反思從前怠時。輟時。或應事。或動念。一一可以指數。則汝固說心爲茫蕩。而獨之所知。何嘗絲毫茫蕩耶。則是汝輩孤負此心。而此心却



未孤負汝輩。天果明嚴。須當敬畏。敬畏。

問格致之傳。不必再補。果然否。羅子曰。大學原只是  
一章書。無所謂經。無所謂傳也。亦無所從缺。無所  
從補也。蓋其書從頭至尾。只是反覆詳明。以顯大  
人之學。其初說明明德親民。當止諸至善。如一破  
題相似。却卽接連說。但能知至善所當止。則其意  
自定。其心自靜。其身自安。以慮家國天下。而自得  
其平矣。此是一個承題相似。却亦只是反說。以見  
明親當止至善也。於是又申明如何是當止之至。

善蓋明親這個物事其未終貫徹天下而其本初却根諸身心此是一定格則先知得停當然後徹得停當惟古之欲明明德於天下者能如是焉所以身心家國無不停當而爲明親之善之至也又決言自上至下既皆以身爲本而後停當若本亂且薄則決無停當之理所以必知本乃謂知至善也此却如小講相似亦不過將明親止至善衍說一遍至所謂說其意者以下則如一大講逐件物事詳細條陳一段格則而格則最停當處則俱指

示以淇澳等詩。帝典等書。又卽是以古之明明德於天下者。爲至善也。推之如所謂正心脩身。所謂齊家治國平天下。直至此謂國。不以利爲利。而以義爲利也。總是每件物事。與他一個至善格子。而爲學者所當知者也。則一章。尾原自相應。亦自完全。何容補湊。

或曰。某於師語。皆能了悟。獨大學格物。猶似泛而不切。羅子曰。何謂不切。曰。至善豈專屬古聖已耶。曰。此近世學者。於朱子矯枉過中。更不小心。下氣將。

孔子自身得力處。討個入頭。他原說述而不作。信而好古。竊比於我老彭。又說我非生而知之。好古敏以求之。故自十五而志於學。直至五十而學易。孔子一生受用此個學字。所以曰大學之道。蓋言學大人有個道。而其道則在明德親民而止至善也。孟子道性善。言必稱堯舜。却明白說出規矩者方圓之至。聖人者人倫之至。此個至字。又是孟子善發孔子信好古聖之一副肝腸。如射之必設正鹄。樂之必始金聲。而曰夷惠伊尹皆古聖人。吾未

能有行。乃所願。則學孔子。然孟子之學孔。孔子之學堯舜。豈是含了自己的性善去做。但善則人性之所同。而至善則盡性之所獨。故善雖不出於吾性之外。而至則深藏於性善之中。今一槩謂至善總在吾心。而不專屬聖人。是卽謂有腳則必能步。而責扶携之童。以百里之程。有肩則必能荷。而強皆垂之孺。以百觔之擔。豈知中庸初只言誠聖。而末後方言至誠至聖。此聖誠兩個至字。與無聲無臭至矣的至字。正打對同。所以謂聖智不達天德。

不足以知。夫聖智猶且不足知天下之誠之至。况非聖智者乎。曰大學至善。却如何。又最初卽說知也。曰何必大學。中庸最初亦卽說中庸其至矣乎。民鮮能久矣。但雖明白曉得。人不易能。而不可不先求知。此則規矩方圓之至。大匠不敢因拙工而改廢之。况今細細推詳大學之言至善也。不過親親長長。達之天下。却又與中庸其至的至處。適貫一理。正如夜明珠。原懸衣帶。必待識寶。圓圓乃能拈出。予謂至善在已。是就衣帶所懸者言之。予謂

至善屬聖訓、是就法眼拈出者言之。雖所指不同、而同歸此個寶珠也。

諸生侍坐、朗誦會語、或嘆曰、我師談道、每當天人合一、與心跡渾融處、真是令人豁然有省、而躍然難已、在我。昭代當特稱一宗、而大事因緣、關係世道民生、非云小可也。大衆聞之、同聲欣慶。羅子因舉格物之論爲問、或咲而言曰、此事有個公案、請正。宋時晦菴先生、意似向外、乃於無極太極、再四稱是。象山先生、意似向裏、乃於無極太極、再四相

非近如我師歸宗性地。却又以至善爲聖訓格言。門下獨不謂然。則又留心經解之最篤者也。豈非古今一異事也哉。曰此處關鍵頗重。故不敢苟從。但爾等蓄疑不放。久當沛決江河也。或靜默久之。曰老師以孝弟慈。喫緊提掇性體。且於諸家講說。非排特甚。故居常謂老師言。固尊信聖謨而已。身不免相背。曰此却兩下各有個意思。須要分別明白。蓋爾將至善看作純全天理之極。謂是人人性體。予則謂此體雖同然。惟至聖乃能先得。今且莫



說純全極處衆不能知。卽近易粗淺。如一個孝弟  
慈。若非大學懇切提撕。誰人曉得從此起手。起手  
之差。其初不過毫釐。而究竟結果。其終將謬千里。  
故知爾天理純全。雖似近而反不近。如鄙見所憑  
聖訓格則。雖似遠而實不遠。予則只得孟子之道  
性善一邊。鄙見則并孟子言必稱堯舜兩邊兼得  
也。

問中庸之書原出禮記。今看大哉聖人之道一章與  
斯禮也。達乎諸侯大夫及士庶人。又與親親之殺。

禮所生也。果然皆爲禮。經而發。羅子曰。何待至此。卽首章中和二字。便開口說出此禮精髓。其後所云。皆禮之膚髮而已。曰喜怒哀樂未發。謂之中。先儒觀未發氣象。不知當何如觀也。曰子不知如何。謂爲喜怒哀樂未發。又如何知得去觀其氣象也。耶。我且詰子。此時對面相講。有喜怒也。無曰無有。哀樂也。無曰無。曰旣謂俱無。便是喜怒哀樂未發也。此個未發之中。是吾人本心常體。若人識得此個常體。中中平平。無起無作。則物至而知。知而喜。

怒哀樂出焉。自然與預先有物橫其中者。天淵不  
侔矣。豈不中節而和也哉。故曰忠信之人。可以學  
禮。中心常無起作。卽謂忠信之人。如畫之粉地。一  
樣潔潔淨淨。紅點着便紅。鮮綠點着便綠。明其節  
不爽。則其文自著。節文旣著。而禮道寧復有餘蘊  
也哉。

問吾儕往時。只說道中庸是本書。今日方曉得中庸  
是個人也。第吾終日講解說本中庸。却無一個曉  
得我自已。卽是中庸。羅子曰。天下古今豈止自是

中庸而不肯自認做中庸一端而已哉。卽如仁者人也。分明自己是仁。却死殺不肯自認做仁。又如知之爲知之。不知爲不知。分明自己是知。却死殺不肯自認做知。靜靜思之。我此半世。孤負天地造化。賦與虛靈之至寶。而甘心輕棄於塵泥。孤負父母劬勞。養成軒昂之丈夫。而甘心同朽於草木。孤負千聖萬賢。作經作傳。掀開天賜之寶藏。打醒降生之元神。而採取不肯伸手。觀玩不肯舉目。甘心歸頑頽惰。將以下愚終此一生。其罪愆積久。真自

追悔無及。但願我有學諸大長者。有志諸大英傑。大家同加警覺。大家爭自濯磨。戰兢以奉若明命。懇切以期報親恩。潛思以睿通聖蘊。則仁知中和。昔在書冊。今皆渾全在我此身。則光岳元神。浩然還復充塞。至寶輝煌。赫爾朗照乾坤。不惟鄙人之罪過蠲消。而且諸公之功德無量矣。

問中庸一書其義理真是涵藏無盡。然非先王善於發揮。則茫蕩無所從入。今覺聞教以來。不止作聖途徑極其簡要。且於世道人心甚相關切。願不惜

底裡爲諸人詳之。羅子遜謝既久，乃改容嘆曰：「芳至不才，然幸生儒家，方就口食，先妣卽自授孝經小學論孟諸書，後同先君遇有端緒，便將自前孝友和平，反覆開導，故尋常於祖父伯叔之前，嬉遊於兄弟姊妹之間，更無人不相愛厚。但其時氣體孱弱，祖父最是憐念，不離年至十五，方讀論語，出就舉業，所遇之師，却是新城張洵水先生，名璣，爲人英爽高邁，且事母克孝，每謂人須力追古先，於是一意思以道學自任，却宗習諸儒各樣工夫，屏

私息念忘寢忘食。柰無人指點。遂成重病。賴先君  
舊領陽明先生之教。覺兒用功致病。乃示以傳習  
錄一編。不肖手而讀之。其病頓愈。而文理亦復英  
發。且遇楚中高士。爲說破易經。指陳爲玄門造化。  
予竊心自忻快。此是天地間大道真脉。奚啻玄教  
而已哉。嗣是科舉省城。縉紳大舉講會。見吉中顏  
山農先生。名鈞。今改名鐸。芳具述昨邁危疾。而生死能不  
動心。今失科舉。而得失能不動心。先生俱不見取  
問之。曰。是制欲。非體仁也。芳請克去己私。復還天

理、非制欲也。能以遽體夫仁哉。先生曰：子不觀孟氏之論四端乎？知皆擴而克之矣。如火之始燃，泉之始達，如此體仁，何等直截。故子患當下日用而不知，勿妄疑天性生生之或息也。時芳大夢忽醒，乃知古今道有真脉，學有真傳，遂師事之。比聯第歸家，苦格物莫曉，乃錯綜前聞，互相參訂，說殆千百不同。每有所見，則以請正先君。先君亦多首肯，然終是不爲釋。然三年之後，一夕忽悟，今說覺心甚痛快。中宵直趨卧內，聞於先君。先君亦躍然起。



舞曰得之矣。得之矣。迄今追想一段光景。誠爲生平大幸大幸也。後遂從大學至善。推演到孝弟慈。爲天生明德。本自一人之身。而未及國家天下。乃凝頓自己精神。沉思數月。遐想十五之年。從師與聞道學。其時目諸章縫。俱是汙俗。目諸黎庶。俱是冥頑。而吾儕有志之士。必須另開一個蹊徑。以去思念存心。別起一個戶牖。以去窮經造理。餅樣雖盡。完全饑飽了。無干涉。徒爾苦勞心身。幾至喪亡。莫救於此。不覺驚惶戰慄。自幸宿世何緣得脫。

等苦趣已。又遐思童稚之初。方離乳哺。以就口食。嬉嬉於骨肉之間。怡怡於日用之際。閑往閑來。相憐相愛。雖無甚大好處。却又也無甚大不好處。至於十歲以後。先人指點行藏。啓迪經傳。其意趣每每契合無違。每每躬親有得。較之後來着力去處。難易大相徑庭。則孟子孩提愛敬之良。不慮不學之妙徵之幼稚。以至少長。果是自己曾經受用。而非虛語也。夫初焉安享天和。其順適已。是如此。繼焉勉強工夫。苦勞復是。如彼精神之凝思愈久而。

智慮之通達愈多。由一身之孝弟慈。而觀之一家。一家之中。未嘗有一人而不孝弟慈者。由一家而觀之一國。一國之中。未嘗有一人而不孝弟慈者。由一國之孝弟慈。而觀之天下。天下之大。亦未嘗有一人而不孝弟慈者。又由縉紳士夫。以推之羣黎百姓。縉紳士夫。固是要立身行道。以顯親揚名。光大門戶。而盡此孝弟慈矣。而羣黎百姓。雖職業之高下不同。而供養父母。撫育子孫。其求盡此孝弟慈。亦未嘗有不同者也。又由孩提少長。以推之。

壯盛衰老。孩提少長。固是愛親敬長。以能知能行。此孝弟慈矣。便至壯盛之時。未有棄却父母子孫。而不思孝弟慈。豈止壯盛。便至衰老臨終。又誰肯棄却父母子孫。而不思以孝弟慈也哉。又時乘閑暇。縱步街衢。肆覽大衆車馬之交馳。負荷之雜沓。其間人數。何啻億兆之多。品級亦將千百。其異然自東徂西。自朝及暮。人人有個歸着。以安其生。步步有個防簡。以全其命。窺覷其中。總是父母妻子之念。固結維係。所以勤謹生涯。保護軀體。而自有

不能已者。其時中庸天命不已。與君子畏敬不忘。  
又與大學貫通無二。故予自三十登第歸山。中間  
侍養二親。敦睦九族。入朝而徧友賢良。遠仕而躬  
禦魑魅。以至年載多深。經歷久遠。乃嘆孔門學庸。  
全從周易生生一語。化將出來。蓋天命不已。方是  
生而又生。生而又生。方是父母而已身。已身而子。  
子而又孫。以至會而且玄也。故父母兄弟子孫。是  
替天命生生不已。顯現個皮膚。天命生生不已。是  
替孝父母兄弟長慈子孫。通透個骨髓。直豎起來。

便成上下今古橫亘將去便作家國天下孔子謂  
仁者人也親親之爲大焉其將中庸六字已是一  
句道盡孟子謂人性皆善堯舜之道孝弟而已矣  
其將中庸大學亦是一句道盡然未有如我  
太祖高皇帝聖諭數語之簡當明盡直接唐虞之統  
而兼總孔孟之學者也往時儒先每謂天下太平  
原無景象又云皇極之世不可復見豈知我  
大明開天千載一日造化之底蘊既可旁窺舉世之  
心元亦從直指盡數九州四夷之地何地而非道

盡數朝野蠻貊之人何人而非道。雖貧富不同而  
供養父母則一。雖智愚不等而教訓子孫則一。雖  
貴賤不均而勤謹生理則一。故芳至不才敢說天  
下原未嘗不太平而太平原未嘗無景象。而王道  
極其蕩平亦且極其正直不容作好作惡於其間  
也。然其皇極世界舍我。

大明今日更從何求也哉。故前時皆謂千載未見善  
治。又謂千載未見真儒。計此兩段原是一個。但我  
大明更又奇特。蓋古先多謂善治從真儒而出。

朝。則。是。真。儒。從。善。治。而。出。蓋。我。

太祖高皇帝、天縱神聖、德統君師、只孝弟數語、把  
人精髓、盡數捧在目前、學問樞機、頃刻轉回、脚底  
以我所知、知民所知、天下共成一個大知、以我所  
能、能民所能、天下共成一個大能、知能盡出天然  
聰明、自可不作、此豈非聖治之既善、而儒道之自  
真也哉、竊謂論治於今日者、非求太平之爲難、而  
保太平之爲急、談學問於今日者、不須外假乎分  
毫、自是充塞乎天地、此棟風光、百千萬年、乃獲一



見而吾儕出世。忽爾遭逢於此。不思仰答。天恩。勉脩人紀。敢謂其非夫也已。已。敢謂其非夫也已。

問中庸比之大學。似更深奧。程子曰。先賢亦云大學。爲入道之門。但以鄙見臆度。則義理勿論。而其次第。則當先中庸而後大學。時坐中習禮記者愕然。曰。先生豈嘗細觀禮經篇目耶。蓋二書雖宋時選出。而現存篇次。則果中庸先而大學後也。問者曰。大學係曾子所作。中庸係子思所作。何得世次亦無序耶。曰。二書所作。果相傳如是。但竊意孟子每

謂願學孔子而七篇之言多宗學庸則此書信非  
孔聖親作不能而孔聖若非五十以後或亦難着  
筆也蓋他分明自說五十而知天命今觀中庸首  
尾渾全是盡性至命而大學命世規模以畢大聖  
人能事也故中庸以至誠至聖結尾而大學以至  
善起頭其脉絡似彰彰明甚自揣鄙見或亦千慮  
一得而非敢空杜撰也試共思之

問大學自有先後之序如何必先中庸羅子曰吾人  
此身與天下萬世原是一個其料理自身處便是

料理天下萬世處。故聖賢最初用功。便須在日用常行。日用常行。只是性情喜怒。我可以通於人人。可以通於物。一家可通於天下。天下可通於萬世。故曰人情者。聖王之田也。此等平正田地。百千萬人所資生活。却被孟子一口道破。說人性皆善。若不先認得日用皆是性。人性皆是善。蕩蕩平平了。無差別。則自己工夫。已先無着落處。又如何去通得人。通得物。通得家國。而成大學於天下萬世也哉。

問大學首重格物、如中庸論孟章旨各殊、難說皆格物也、羅子曰、豈止四書、雖盡括五經、同是格物一義、蓋學人工夫、不過是誠意正心、脩身齊家治國平天下、而四書五經、是誠正脩齊治平之善之至者、聖人刪述、以爲萬世之格、大學則揭其尤簡要者而約言之、所以謂之曰在格物也、今觀其書、通貫只是孝弟慈、便人人親親長長、而天下平、孟子謂其道至邇、其事至易、予亦敢謂其格至善也、曰今世學人、誰不在身心家國上用功、其用功亦誰

不將聖人方法講求，則人人現成，盡是格物矣。又何必特地拈出，以起一番爭論？曰：此是古今一大關鍵。細觀古人，惟是孟子一人識得。其他大賢大儒，總皆忽畧過了。蓋宇宙乾坤，聚精會神，纔生得一個孔子。孔子自十五志學，千辛萬苦，好古敏求，纔成得大學一書。其書乃仁、天、下、萬世之格。則視其他泛論之言，不同。孟子有見，所以把列聖羣賢一齊攤開，而只願學孔子也。故吾人不期學聖，則已。學聖則必宗孔子，而宗孔子則舍大學奚以哉？

此格物所以爲古人一大關鍵。不辭罪我而妄肆言說也。觀者亮之。

問慎獨工夫。羅子曰。慎獨一言。並作於中庸大學。夫吾人生宇宙間。自旦至暮。自少至老。樞紐默運。只此一個虛靈。雖幫奏些子不上。却瞞昧些子不過。所謂已獨知之者也。獨之靈體。通徹於帝天。獨之妙用。昭察於率土。中庸爲根極道原。乃的指此知之見於隱顯於微而天命臨鑒無須臾之或離。故嚴恭寅畏。無毫髮之敢忽。是則慎之所自起者也。

大學欲明明德於天下。乃切示以絜矩之方。謂如保赤子。心誠求之。所欲則與聚。所惡則勿施。吾心之知不昧。斯在人之性不拂。辟則將爲天下僇矣。有國家者。敢不嚴畏乎哉。是則獨之所由施者也。然大學之云好者。卽中庸之所喜而樂者也。大學之云惡者。卽中庸之所怒而哀者也。要之忠恕二字。足以盡之。蓋中心守正。則喜怒哀樂必無妄。如心順應。則隨所好惡。天下均平矣。聖門求仁之法。真是約而不煩。簡而無外。慎獨一言。直

之宗、王道之要也。凡存乎人者、豈無是心之良哉。其所以喪失而乖戾者、則以物交之爲引、而喜怒之無節、則天理滅而違禽獸也不遠矣。嗚呼、平日好惡、與人相近也者幾希、知之在於獨者、何其親切而著明哉。慎茲以往、而須臾弗離、則中庸之明命、大學之明德、自可上通乎帝天、而下光乎率土矣。

問學庸二書、會講中論亦縷縷然、其貫通合一之義、請更詳之、庶便人人從事也。羅子曰、此二書却是



孟子道性善言必稱堯舜二句。足以盡其梗槩。蓋先王立教。本是欲人之皆爲聖人。但不明性善。則無根源。不法先聖。則無規矩。然古先聖人。所以足爲作聖之規矩者。正以其只盡自己之性。只明己性之善。而更無纖毫之或取諸外也。今且不論其。他且說孔子及門之士。動以千百。孟子及門之士。亦動以千百。豈不個個志凌物表。而個個見出人羣。但叫他盡己之性。則肯。叫他信己性之善。以爲己之則不肯矣。叫他學爲堯舜。則從。叫他只把孩

之孝弟去學堯舜則不從矣。及門之士且然。則其  
他私淑教言。以至後來想望丰采者。又將何如。聖  
人于此也。無可柰何。欲以盡言。而信從者寡。欲遂  
不言。而學脉未廢。於是筆此二書。其書雖各自爲  
篇。而貫通只是一意。中庸雖若專言性善。而聖人  
所以盡性之底蘊具在也。大學雖若專言法聖。而  
性善所以成聖之脉絡具存也。今且論天下中從  
何來。乃民受天地之中以生也。庸何從名。乃中等  
平常之人也。今此中等之人。名以庸常之輩者。又

豈不謂各隨己性而易簡率直也哉。此簡易率直以爲知。其知不須人思慮。却是陽明發越。而天命之照耀也。此簡易率直以爲能。其能不須人學習。却是陽和克盞。而幾命之活潑也。故性不徒性。而曰天命之謂性。性此不慮之知。旣爲天知。則舉千萬人而可以同知。此不學之能。旣爲天能。則舉千萬人而可以同能。故道不徒道。而曰脩道之謂教矣。夫此道根諸命。顯諸性。普諸教。則天與吾人更無一息之可離。而吾人與天又可一息之不畏。

也哉。但可惜百姓却日用而不知。故其庸常知能。原雖赤子皆良。後來無所收束。則日遂散誕。加以見物而遷。可好而喜。樂輒至。過甚可惡而哀。怒輒至。過甚貪嗔橫肆。將由惡終矣。惟是君子顧誕天之明命。性靜時惺惺然戒慎。性動時惺惺然恐懼。於潛隱而常若昊天。之現前於微暗而常若上帝之臨照。慎獨既無須臾之或間。則道體自能恒久而不遷。率其簡易之知以爲知。而日夕安常處順。率其簡易之能以爲能。而隨處有親有功。既無喜。

怒亦無哀樂。則性善之中。任其優游造化之中。亦從其中出入矣。此則天然自有之定體。而聖賢不二之定守也。然豈惟未發而然哉。就是喜怒哀樂。或因物來而發。其完養保合。亦自有節而和。夫中和合德於君子之身。則命自己立。而教不自己行也哉。蓋中也者。天下之大本。原可合千萬人而歸之一人。和也者。天下之達道。原亦可以一人而公之千萬人也。故君子致其中於天下。而必使人人之皆中。致其和於天下。而必使人人之皆和。要之

惟日用和順其天常。則物感斯安。全於心極。天地之大。自中庸而定位乎中。萬物之繁。自中庸而並育於外。蓋不已之命。爲繼善之所從出。而無妄之與均。成性之所同然。自非君子教道之脩明。又何以見中庸之純一也哉。夫此道名之曰中庸。見天下萬世。惟此是個恒性。惟此是個常德。而定不做。聖人的盤子。更不容你高着分毫。亦不容你低着分毫。而爲王道之平平。王道之蕩蕩。王道之正直也。初則維本其出於帝天之命。所以表其爲純粹。

之極故首嘆之曰中庸其至矣乎中間將古今許多聖賢聖賢許多大德業或從天而體之於已或從已而贊之於天雖備稱其爲聖神功化之極而實表顯其爲不慮不學之良終則復嘆曰上天之載無聲無臭其至矣乎惟是此個中庸首尾皆嘆其爲善之至所以大學便將此至善欲人止之以爲明德新民之規矩格則也此今細心平心大學一篇相似只是敷演中庸未盡的意義如中庸說肅德肅言而大學則直指孝弟與慈爲天生明德

也。中庸說脩道以成教，而大學則直指興仁興  
爲與民相親也。中庸說身心處，或畧國家說家國  
處，或畧身心等項。大學則直指本末，只是一物，終  
始只是一事，而中間更無縫隙也。中庸說脩齊平  
治，聖人甚樣神化。大學則直指只是其爲父子兄  
弟足法，而人自法之，卽是神化，而俱在面前。日  
可了也。要之均言人性之善，亦均言人須學聖人  
以盡所性之善。中庸多推原古今聖人，由庸常以  
造極至，而其言渾融合蓄。大學多鋪張古今聖人



成德以爲行事而其言次第詳明故雖均盡性而工夫不同雖均法聖而規格却異今且將大學首章請正夫天命流行於穆不已畢竟得日用光昭開朗方顯化工在人之日用則良知也知爲己子則自以慈相親知爲己母則自以孝相親知爲己兄則自以敬相親天德之明知之無盡則人心之親亦相通無盡古今聖人之學所以爲學之大聖人大學之善所以爲善之至吾人欲學其學之大而可不求止其善之至乎於其善之至能知之

斯其學之大。自爾得之。定靜安慮四字。是形容知止之止字。本來純一。亦是顯現至善之至字。極其果確也。蓋天下本末只共一物。未有枝葉而不原於根抵。根抵而不貫乎枝葉者也。天下始終只共一事。未有欲如此結束。而不由如此肇端者也。於此用功。而先後分曉。則明德以親民。其道可以善而善亦可以至矣。試觀古之聖人。欲明明德於天下。夫欲明明德於天下。是本末一物。而始終一事也。他却於所先而先之。治國齊家。而及於致知在

格物也。於所後而後之。格物知至。而及於天下平也。悉心體認。作大學者。其旨趣。要此學。學得大。而又要大學之道。道得善。善得至。明明德於天下。而先之國家。國家而先之身心。原始要終。由天下之本。及天下之末。而了天下之大物也。了天下此個大物。不思古今格。則以格其物。則本何以舉。末末何以歸。本學且未也。而况於善。善且未也。而况於至耶。故緊接以物既得其格。而善斯知其至矣。此個格物。二千年來。訓釋多多少少。芳不量力。主張

茲說極知誕妄。但聯絡大勢。頗爲貫串。查對石刻古文。亦覺不相背戾。況下文天子以至庶人。一是脩身爲本。又自註釋本亂則末難治。蓋本亂則躬不自厚。而所薄又安能以歸厚。此謂知本。此謂知之至。如何本末之格。而非善之至也哉。若本之身心。以通乎家國天下。盡天下國家而管之身心。其說在大學。再無詳於誠意一章。却總是稱述六經賢聖之格言。以立本定舉末之主意。卽便是知止而有定心。正則是能靜。身脩則是能安。齊治平則。

是能慮而得也。至明言盛德至善而民不能忘。復  
詳所以沒世不忘。却是親親賢賢。樂樂利利。至後  
頭將親親賢賢演出許多。上老老而民興孝。上長  
長而民興弟。上恤孤而民不倍。將樂樂利利演出  
許多。用人理財。要之上下四旁。各得分願。貫天下  
國家。本末相共爲一物。始終相共爲一事。學問規  
模。果然是大。所引章句。一一俱出六經。所指德業  
一一俱是帝王賢聖。序以循之。而條理不紊。會  
以通之。而體統之可一。學問格別。而心合於

人心之公。極夫天然之善而至也。夫孝是孩提而  
知愛。弟是孩提而知敬。慈是未教而養子。若非中  
庸推原出于天命之性。標顯率於平常之道。何以  
使人人信從。而知爲古今之學之大也哉。經綸天  
下之大經。立天下之大本。直至知天地之化育。若  
非大學指陳爲千聖之成法。萬世之的訓。何以使  
人人奮勵。而必精造身心。大學之善之至也哉。嗚  
呼。吾夫子在世七十餘年。其心只以仁天下萬世  
爲心。其事只以仁天下萬世爲事。故曰我學不厭。

而教不倦。今看二書其真切懇到。令人人可想見  
興起而不容已。芳是敢於今日直述荒謬而漫爲  
之辭。其亦思效涓滴於滄海。而益纖埃於崧華也。  
知我罪我。幸共鑒諸。

萬曆甲戌季冬。羅子會五華書院。三生講書。初仕而  
優則學。次顏淵季路侍。又次富與貴。畢衆求爲之  
啓迪。進諸生而前曰。汝曹今日且須究竟聖賢。平  
生所學者何。所仕者何。大學云格致誠正脩身是  
謂學。齊治均平是謂仕。要之中間貫串一句。只說

明明德於天下。至其實實作用。則只是個孝者所以事君。弟者所以事長。慈者所以使衆。上老老而民興孝。上長長而民興弟。上恤孤而民不悖。細細說。似有兩件。貫通實爲一事。故孔子言志。獨以老安少懷朋友信爲個話頭。看他所志如此。則學便是學這個。仕便是仕這個。此外更無所學。更無所仕。亦更無所謂志也。夫子此志。從十五歲便曉得。要緊此孝弟慈的矩。至六七十歲。與顏淵季路言志之時。便自許得隨心隨意隨處隨人皆隨所願。



而不踰此矩也。此矩隨心而絜，則上便上得其所，下便下得其所，左右便左右得其所，上下左右皆得其所，乃謂之仁。聖人之志，常常不違此仁。蓋自終食之間起，以至終日終年，而直至於七十終身，其心心念念以天下爲一家，而不計自己之家，以中國爲一身，而不顧自己之身，如此而貧，亦如此而富，而無心於去貧處富也；如此而賤，亦如此而貴，而無心於去賤處貴也。漢高祖只是一代英主，且云爲天下者不顧家，況聖人仁天下之志，欲思

老老以及人之老、長長以及人之長、幼幼以及人之幼、其決烈勇猛如火之必熱、如水之必寒、如江河之必於沛然赴海、則其一身之貧賤富貴、又安足係累毫髮也哉。故時常自道曰：飯蔬食、飲水、曲肱而枕之、樂在其中。不義而富且貴、於我如浮雲、爲天下之志直是如此。其切爲身家之意直是如此。彼其輕所以可仕則仕、而可止則止、可久則久而可速則速。彼少有繫累、又安能超絕千古、獨異羣聖、而昭顯時中之心、矩於萬世無疆也哉。諸公咸

相與稱善。命諸生歌南山五章以頌祝大平云。  
武定諸生講天論之謂性一章。殫其大知也。與一章。  
天下國家可均也一章。旣畢。乃進而謂之曰。聖賢  
置此經書。不是徒資吾輩詞章。而國家立學養士。  
亦非徒以詞章望於吾輩。須是悉心體認。俾窮則  
足善其身。達則可善天下也。有問如何體認。曰。此  
書須要先認中庸二字。蓋中庸二字。卽是平常二  
字也。故其首章語道。卽曰率性。率者自然而然。不  
別加意思是也。又曰。不可須臾離。須臾者。自朝

慕無時而非率此性也。又曰喜怒哀樂喜怒哀樂者，本隨感而見，無事而非率此性也。故此個道理，充滿於日用，發舒於性情。聖人與惡人一般，今大與古人一般。故善求道者，不求諸古，只求諸今，不求諸聖，只求諸愚。蓋識得今時愚人所知能的，便通得古時聖人所知能的了。夫子以世之學者，不曉得如此求道，往往慕於高遠而失之，故將大舜來做箇則樣，說這天下皆稱真舜帝是太知，而不知舜之所好問而察者，無不誠近之言，而其所循

執而用者又只是下民之中。蓋言有淺近而理無淺近。淺近之言卽理也。民有卑下而中無卑下。卑下之民亦中也。試看今時閭閻之間。愚蠢之婦。無時不抱着孩子嬉笑。夫嬉笑之言語最淺近。閭閻之村婦最爲卑下。殊不知赤子之保孩提之愛。到反是仁義之實。而齊治平之本也。且細細論之。則不惟舜之用中於民而已。鳶魚飛躍而上下察焉。又用中於鳶魚也。庭前意思自家一般。又用中於草木也。五輩有志在家要做好人。只是循着

知良能以孝親敬長而須臾不離便做得好人在外裏做好官只是猶着良知良能以率人孝親敬長而須臾不離便做得好官若人人如此便中庸可能矣奈何管商之徒惟以法制把持天下且個個爭効法之是做好官的不以中庸做好官矣長沮桀溺以高潔而辭爵祿荆軻聶政以意氣而蹈白刃且個個爭効法之是做好人的不以中庸做好人矣此夫子所以重嘆中庸之不可能乃是就以前數等之人說他不能非謂中庸之果難能也

夫以前數等之人、原生學問不明之時、委無足怪、  
若今我明聖諭、首先以孝弟慈和爲治、而先儒  
陽明諸老、又惓惓以良知良能爲教、則諸生視前  
人、已是萬幸、正好起此發憤、做個真正好人、做個  
真正好官、以光顯此地新闢之學宮、而副君長  
師友作興之美意也、豈非一大快事耶、勉之、勉之。  
彌勒諸生、講爲政以德一章、道之以政一章、旣畢、羅  
子進講者、問之曰、汝講爲政以德、的德字、道之以  
德的德字、說許多以內聖爲外王、以精神心術爲

導已。是詳備可聽。但不曉得個着落。則三會處便不切實。既欠切實。則講貫處便不精神。我且問你爲政以德政字。可就是道之以政的政字否。曰卽是云。此個政字。曰無爲而民自歸的民字。可就是民免而無恥的民字否。曰卽是此個民了。曰政爲民而立。則政之所云必民。政旣是民間之事。則爲政以德之德。道之以德之德。便須曉得聖人說的。亦就是民間日用常行之德也。民間一家。只有三個人。父母兄弟妻子。民間一日。只



有三場事。奉父母。處兄弟。養妻子。家家日日能盡力。幹此三場事。以去安頓。此三樣人。得個停當。如做子的。便與父一般的心。做弟的。便與哥哥一般的心。做妻的。便與丈夫一般的心。恭敬和羹。此便是民三件好德行。然此三行。却是民生出世帶來的。孟子謂孩提便時。

親稍長。便曉得敬兄。未學養子而嫁。便曉得誠求中。真是良知良能。而民之秉彝好是懿德也。但這民衆無上人與他說明。此是人家第一好事。大家該做。卽說與

他聽叫他去。做又無人做樣子。與他看。便說也不信。所以人家父子兄弟夫妻之間。不免相忤相爭。本來美德。却反成惡俗矣。故聖賢爲政。不徒只開示條款。嚴立法令。教他去孝弟慈。而自己先去孝弟慈。如所謂老吾老以及人之老。長吾長以及人之長。幼吾幼以及人之幼。久之則爲父子兄弟足法。而人自法之。便是上老老而民興孝。上長長而民興弟。上恤孤而民不悖。果然有耻且格。若北極一旋。而衆星自環拱之。更不待上之人去刑罰他。

追究他。自。然。大。順。而。大。化。也。若。泛。然。只。講。個。德。字。  
而。不。本。之。孝。弟。慈。則。恐。於。民。身。不。切。而。所。以。感。之。  
所。以。從。之。亦。是。漫。言。而。無。當。矣。若。論。以。德。爲。政。却。  
又。有。個。機。括。俗。語。云。物。常。聚。於。所。好。又。曰。民。心。至。  
神。而。不。欺。今。只。爲。民。上。者。實。見。得。此。孝。弟。慈。三。事。  
是。古。今。第。一。件。大。道。第。一。件。善。緣。第。一。件。大。功。德。  
在。吾。身。可。以。報。答。天。地。父。母。生。育。之。恩。在。天。下。可。  
以。救。活。萬。民。萬。物。萬。世。之。命。現。現。成。成。而。不。勞。分。  
毫。做。作。順。順。快。快。而。不。費。些。子。勉。強。心。心。念。念。

親母親不喜歡抱養孩兒。誰的哥哥姐姐不喜歡  
看護小弟小妹。人這個生性。這樣良善。官人與與  
人一般。漢人與夷人一般。南人與北人一般。大  
明朝人與唐虞朝人也是一般。但堯舜生來。見得  
這個是我的天性。亦是人的同性。既以之自盡。亦  
以之盡人。但人有一句善言入耳。便懽然覺如己  
的善言。人有一件善行入目。便懽然覺如己的善  
行。不用去取。而無善不取。不用去樂。而無取不樂。  
所以能底豫克諧。而致天下之善士皆歸。一年成

聚二年成邑。三年成都。無人無我而渾然。天下皆定。皆化。會歸於大同也。仲尼祖述堯舜。却指出個仁來立教。其自註解曰。仁者人也。親親爲大。當時弟子除顏曾外。更無一個肯信。後來却得一個孟子走將出來。便一口道盡說仁之實事。親是也。故今細看兩人精神。但有問答言詞。每每貼在各人身上。纔說各人自己。便關連着天下人身上。總是他見透了那堯舜善與人同的根源下落。所以纔教顏子克己復禮。便曰。一日天下歸仁。纔教仲弓

所惡勿施。便曰在邦在家無怨。教子路以爲政。卽是躬行孝弟於上。教冉有以富而教之者。卽老者衣帛食肉。黎民不饑不寒。謹庠序之教。申之以孝弟之義也。卽如君子三樂一章。亦是要以首章爲主。蓋父母俱存。是樂於盡孝。兄弟無故。是樂於盡弟。能以孝弟爲樂。方仰無愧於好生之德。所謂在家邦爲孝子。在天地爲仁人也。方俯不作於人。而孩提無不愛親。無不敬長。不失赤子之心。名爲大人也。方是老吾老以及人之老。長吾長以及

人之長幼。吾幼以及人之幼。家邦自此而無怨。天下自此而歸仁。家邦天下咸歸夫仁。則可盡得一世明睿之賢才。覲德觀風。踴躍興起。以與人爲善。而歸於大同也。不曰人皆可以爲堯舜。而何哉。於是合堂貴賤。凡千百之衆。皆同聲感嘆。謂果然我等人人皆可做得。羅子復申而告曰。此時諸人各各信得極。是古今希有之事。當時孟子一生之言。未曾得一個相信。有個樂正子。雖是見得此個西。可欲可愛。然問他是自己性生的。便不覺有疑。

夫有諸已之謂信。蓋能信得有諸已也。蓋此信字。對疑字看。是樂子半疑半信。所以說他在善信之間。此處既信不透。則隔礙阻滯。決不能得黃中通理。黃中所通者。卽一陽真氣從地中復。所謂克己而復者也。中通而理者。卽陽光而明。所謂復以自知。而文理密察。以視聽言動而有禮者也。故從此而美在其中。從此而暢於四肢。發於事業。便是以可欲而先諸已。施諸人。通諸天下。及諸後世。方可以望乎大而化。化而神也。樂正子以後。則孔孟此



路真脉斷絕不談及宋時乃得諸儒興起中間也不免疑信相半至有以氣質來補德性說是有功於孟子看來還於性善處有未脗合至我太祖高皇帝挺生聖神始把孝順父母六言以木鐸一世聾聵遂至真儒輩出如白沙陽明諸公奮然直指人心固有良知以爲作聖規矩英雄豪傑海內一時興振者不啻十百千萬誠爲曠古盛事今日諸君欲見如何爲顏冉家邦天下之人只此堂便是如何爲魯衛先勞教養之政只此堂便是如何

爲君子三樂。只此堂便是。如何爲唐虞堯舜與人爲善。翕然大同。亦只此堂便是。蓋此個性善。平平地舖在滿堂。高也。高不得。低也。低不得。也不許你有餘。也不許你不足。也更不要說先時。也更不要說後日。只各各在於當人。人人在於當處。所以謂之曰平常。又謂之曰中庸。以此中平之理。常在於身。便曰平心。易氣。以此中平之理。施之於人。便曰平易。近民。以此平政率民。而民從之。便曰人人親其親。長其長。而天下太平也。衆忻忻曰。我等各各

須歡天喜地以共享我 太祖高皇帝 當今皇  
上太平之福於無疆無盡也已。

看屏諸生講天命之性一章顏淵問仁一章君子之  
道辟如行遠一章畢羅子進講者問之曰經書註  
疏因求理趣明白故不容不爲詳悉分別中須識  
得渾融處方於汝身有個受用卽如中庸首章說  
有性有道有教至行遠登高却只說個君子之道  
是豈無天命與仁在中至克己復禮却只說個仁  
是又豈無性道與教在中故善讀書者旣知詳悉

於章旨更兼統會於自身。否則如說食者雖詳明其種藝根苗而滋味不會入口。說衣者雖悉曉其織衽絲縷而和煖未曾着膚。縱讀書萬卷於子竟何益耶。其生良久對曰。今只能存此心。即可兼通諸書矣。羅子詰之曰。如何是汝之心。又如何存汝之心。生曰。只常時求盡孝弟便是存心。復詰之曰。孝弟二字極說得是。但今時汝之父母兄弟俱未在此。如何去盡孝。盡弟。或又只仍前說書相似矣。生良久進曰。此時對太公祖。可是存心否。羅子曰。

心活潑潑地東西在家便孝弟在此便對答順而  
循之便謂之存矣其生忽然踴躍不勝曰吾心頓  
覺開明羅子指而言曰此時汝心他人不及見處  
卽是隱卽是微而獨覺光明處卽是莫見乎隱卽  
是莫顯乎微此個莫見莫顯之體雖率汝自家心  
性然却是天之明命而上帝監臨之也蓋天與人  
原渾然同體其命之流行卽已性生生處已性生  
生卽天命流行處但一顧認則見得須臾難離惕  
然警覺恐然悚動而光輝愈發越卽是火之始

燃而一陽之氣從中復也。地中卽謂之黃中。中而通者。乾陽之光明。知之所始也。乾知大始處。便名曰復。復也者。卽子心頓覺開明。所謂復以自知者也。子心旣自知開明。又日見光輝。愈加發越。則目便分外清明。耳便分外虛通。應對便分外條暢。手足便分外輕快。卽名中通而理。所謂天視自己視。天聽自己聽。已身代天工。已口代天言也。頃刻之間。暢徧四肢。則視聽言動。無非是禮。喜怒哀樂。無不中節。天地萬物。果然一日而皆歸吾仁。以位之

育之。而其脩道立教之機。亦只反觀一己身中。更不俟他求而有餘裕也。故先儒有解克己復禮。作能身復禮。非禮勿視聽言動。作只此禮以視聽言動。更覺順快。然又有說焉。予之反觀身中。雖已見得開明。見得發越。但恐子或謂我是讀了許多經書。做了許久秀才。歷了許大事體。方纔有此知覺。是則只從道之高遠處看。却不道君子之高遠。原自藏在卑近處也。何謂高遠。汝今日光輝發越。是心知之充廣者也。何謂卑近。汝原日赤子出世。是

心知之萌動者也。然汝初出世做赤子時。孩之則笑。提之則動。見父母便愛。見哥哥便敬。其心知了。了。視聽雖微也。未嘗不條理。喜怒哀樂雖弱也。未嘗不節奏。是則至卑至近之中。而至高至遠的道理。何嘗不悉寓於其內耶。今時解說把父母其順做高遠。據孟子說人之良知與大學說未有學養子而後嫁。則宜兄弟和妻子順。父母正是鄉村愚夫愚婦之所共知共能者。恐只可作卑近而高遠自在方更有味也。由此三章統會看來。則孔門宗旨渾



然只是一個仁字。此仁字。溯其根源。則是乾體純陽。生化萬彙。無一毫之間。無一息之停。無一些子之昏昧。貫徹民物。而名之曰天命之性也。本其發端。則人人不慮而自知。孝不學而自能。弟不教而養。子自心求而中。默順帝則。莫識莫知。名之曰率性之道也。究其中間作用。則聖賢以人弘道。敬而脩之。初須直信本心。從中通悟。而陽光內透。天命其在我矣。繼須顧諟天明。慎畏將奉。赤子真心。于時保之矣。由是邇而可遠。卑而可高。禮與天地而

同其中樂與天地而同其和萬民賴之以立極萬  
物藉之以完生而吾自己一腔之中亦將同體乎  
萬方萬世而希乎踐形惟肖之歸矣諸君其共勉  
之

通海諸生講人之所不慮而知者一章君子有三變  
一章時邑中居民無老幼咸聚觀聽羅子謂之曰  
讀聖賢之書先要見得聖賢之心事其書說着方  
有精神衆人聽着亦有滋味聖賢之心何心哉孔  
子曰吾十有五而志於學朱子註得極好曰學大

學也。志大學者，欲人明明德於天下也。明德只是個良知，良知只是個愛親敬長，愛親敬長而達之天下，只是興仁興義而脩齊治平之事畢矣。故此一章全重在無不知愛，無不知敬，此無不知三字。一頭管着自己意，知心身；一頭管着國家天下，只因人生出世來，此條命脉原是兩頭都管着，所以大學纔說物之本便連及其末，纔說事之始便要及其終。堯舜纔克明峻德，便親睦九族，平章百姓，協和萬邦；武周纔追王上祀，便達之諸侯，達之六

夫而及士庶人也。達之天下達字。要同中庸達孝的達字解。達孝達字。要同下文達之諸侯的達字解。如云親親以盡仁。敬長以盡義。更無他術。只如古先帝王達之天下而已矣。若依舊講作申明上文看。則前已言無不愛無不敬矣。其詞亦不贅耶。試看此時。對着滿前師生。以及父老子弟。將數百人。那個不曉得要愛親。那個不曉得要敬兄。那個愛親敬兄。不是從出世來。卽知卽能。而與我一般耶。只因爲此一條真正命脉。生來一般。所以他衆

人也。無不忻忻然聽着我講。所以我也無不忻忻然要講與他衆人聽。此等忻忻而講、忻忻而聽、又忻忻而傳播鼓舞、便可致一家仁、而一國興仁、一家義、而一國興義、人人愛親、人人敬長、而達之天下。故必須到天下盡達了孝弟之時、方纔慊快孔子志學的初心。孟子願學的定見。却渾然是造化一團生生之機。而天卽爲我、我卽爲天。亦嬉然是赤子一般愛敬之良。而人亦同己、己亦同人。如此則父母俱存、兄弟無故、固是大幸。聞未然、亦終

思慕而成大孝。又如孔子只因一本孝經得一個  
曾子英才。曾子子思傳至孟子。却把大學中庸孝  
弟慈的家風手段演說成七篇仁義之言。慨張炳  
耀與日月爭光彩。與宇宙爭久大。莫說秦漢唐宋  
之英君誼辟。莫之或先。雖唐虞三代而宰我且謂  
其賢之遠矣。故王天下與達之天下。兩個天下字  
要粘連同看。方知三樂不與存者不是虛空較說。  
乃是作用實事。蓋王天下未必能兼君子三樂。而  
君子三樂果足以該帝王之正天下也。嗚呼。內而

聖外而王盛德大業至矣哉而不出孩提之愛親敬長爲諸生只消以大人不失赤子之心去句便可作今日所講一章之總破題矣大衆愈加忻忻而謝野亦愈加忻忻而錄之以傳云

大理諸生講顏淵問仁一章司馬牛問仁一章樊遲問仁一章子路問政一章子貢問師長問也孰愈一章旣畢羅子顧諸生語曰適講說許多書俱是敷陳世間道理今大衆聚於一堂如此坐立如此相問却是面前實事諸生各

理與今身子上的行事。打個對同。果渾然相合耶。  
抑尚不免有所間隔也。諸生熟無以應。羅子作而  
嘆曰。適纔許多書。却與汝說。上一些對同不來。  
則推之平時。窻下之讀誦。與日場中之文詞。皆  
只是一段虛見。一場閑話。而一套空理矣。與汝竟  
何益耶。故今講孔子的書。便須體察孔子當時提  
醒門下諸賢的一段精神。蓋當時諸賢。亦有如汝  
輩。欲理會道理來問者。孔子則句句字字。只打歸  
各人身上去。求個實落受用。如答顏淵仲弓。以至



於子路子貢莫不同是此段精神就是後來記者將此議論作成經書漢宋諸儒將此經書演成註疏我國家制令又將經書註疏立成科試與有司歲時進講亦皆是接續孔子當時一段精神使天下萬世人人得個實落受用也時一堂上下將千百餘衆咸肅然靜聽更無一息躁動羅子亦默坐少頃謂衆曰試觀此際意思何如衆忻然曰此時一堂意思却與孔門當時問答精神大約相似矣羅子曰豈惟精神可與對面當初講諸書亦可

以一一對面也。蓋此一堂下而輿從次而鄉約父老次而吏典次而生儒。又上而郡縣僚屬。其人品等級誠難一槩。若論此時靜肅敬對一段意氣光景。則賤固不殊乎貴。上亦無異乎下。地方遠近不能爲之分。形骸長短不能爲之限。譬之蒼洱海水。其來或有從瀑而下者。亦有從穴而湧者。今則澄澗一泓。鏡平百里。更無高下可以分別。旣無高下可以分別。則又孰可以爲大過。孰可以爲不及也哉。旣渾然一樣而無過不及。則予與府縣以是意

而先之勞之。諸士諸民亦以是意而順之從之。相通相愛在上者。真是鼓舞而弗倦。在下者亦皆平直而無枉。欲求一不仁之事。不仁之人。於此一堂之前後左右也。寧不遠去而莫可復得也耶。吾人能以此段平明之體。而養之於中。便可以語司馬牛之心。存不放。能以此段平明之心。而推之於衆。便可以語仲弓之所惡勿施。又擴而克之。便可以語顏子之克己復禮。而天下歸仁矣。故孔門宗旨。只是教人求仁。而吾人工夫。只是先須識仁。此時

此會合堂上下百千其心而共一忻忻愛好之情  
百千其目而共一明明覲面之視百千其耳而共  
一靈靈傾向之聽百千其口而共一肅肅無譁之  
止百千其手足而共一濟濟不動之立站故聖人  
指點仁體每日仁者人也又曰君子之道本諸身  
徵諸庶民正說此堂我是個人大衆亦是個人我  
是這般意思大衆亦是這般意思若識得此段意  
思便識當時所謂天下歸仁者是說天下之人  
都渾在天地造化一團虛明活潑之中也此一團虛

明活潑之仁。從孩提少長。便良知良能。所謂人之  
生也。直而無或枉也。卽愚夫愚婦。皆與知與能。所  
謂中於民也。孔門惟顏淵仲弓。此段意思。能自承  
當。所以於己。便復得禮。於人。便行得恕。故一可爲  
邦。一可南面。直是此個體段。承當得來。便自無我  
無人。無遠無近。而渾融合一。若子張子路諸賢。不  
肯輸心向這裏承當。却謂聖賢之學。必有個異乎  
人處。所以或見我不如人。或見人不如我。或見古  
不如今。今不如古。或見凡不如聖。聖不如凡。較短

論長是內非外。或失則大過。或失則不及。或失則躁動。或失則倦怠。至如司馬牛焚遲。則聖人雖把目前事指點與他。他却必要生疑。蓋他定說聖人爲學。又有別一種道理。而不應如此。易易也。于時滿堂稱快。戀戀不忍別去。因命之歌。則歌南山五章。命再歌。則歌勝日尋芳一首。羅子顧諸生笑曰。汝我之依依戀戀。庶幾乎東風面目。而愷悌樂只矣乎。滿堂上下。亦庶幾千紅萬紫。而邦家之基之光矣乎。况天地生機。克長無盡。自茲方而遍之天。

下自此日而引之終古。其萬年而無疆無期也。亦在汝我之勉力何如耳。羅子敬起以稱謝于郡邑僚屬暨諸師生。師生暨郡邑僚屬亦再四於羅子致感。時方朝霧淨展。杲日空懸。光曜臨階。昭融特甚。羅子復揖諸君而申諭之曰。大陽有赫。吾明德也。古之人光被四表。卽克明其明德。而天下歸仁也。慎之哉。此際人已相通。心目炯炯。是則海底紅輪。而復以自知處也。顏何人哉。希之則是。

永昌諸生講天命之性一章。舜其大知一章。知之者

不如好之者一章本奇陳君進諸生求教羅等謂  
講者曰汝曹者謂知之與好好在興樂由精義積  
累工夫乃能然歟殊不知邇所講三章書內知與  
好興樂都藏其中而汝曹未知覺耳故依着汝曹  
今日講套則若知先於好好先於樂樂着孔門三  
章書看來則是樂先於好而好先於知也夫世之  
所謂樂者不過是自然而然後來快活便叫做樂  
也今細看天命之性即是天生自然率性而行即  
是從容快活也大學謂不特學養子而後嫁孟子



謂孩提無不能愛其親。汝試想像人家母親抱着孩兒。孩兒靠着母親。一段嬉嬉融融的意思。天下古今更有何樂可以加此也哉。此便叫做民之秉彝。孔子說詩。謂民有秉彝。故好是懿德。則好實由樂而有也。又曰百姓日用而不知。則知又由樂好而有也。故舜稱大知。便是能知。而其知原於好問。好察。然所好者。却是適宜。所用者。却是庶民之中。淺近庶民。却正是率性自然。而不慮不學者也。又看中庸他章。論聖人却有不知不能。而愚夫愚婦

到可與知可與能。分明說聖賢有不如愚夫婦處。  
其次又嘆鳶飛魚躍爲上下昭察。分明又說人不  
如鳶魚處。蓋人到愚夫婦之居室。物到鳶魚之飛  
躍。果然渾是一團樂體。渾是一味天機。一切知識  
也。來不着。一切作爲也用不去。至於汝曹適纔許  
多講套說話。雖似曉得一般。然究竟率性中和。則  
實相去天淵之不如矣。故古人善形容樂體者。若  
陶淵明却云。木忻忻以向榮。周元公却云。庭草一  
般生意。夫草木無知。豈果能意思忻忻也哉。惟是

土公會得此個樂機。則便觸處自然相通。汝曹在此。若肯徹底融會。草木無知。且自忻忻。而我獨可悶悶。耶。魚鳥至微。且自昭察。而我獨可味塞。耶。夫婦之愚。且可與知與能。况衣冠堂堂。萬萬非衆人比。耶。孩提之時。且已良知良能。况既壯且老。萬萬非幼稚比。耶。於此頓覺心胸開豁。耳目靈通。四肢百骸。俱輕快爽朗。此便是一陽之氣和暢光明。若從平地裏頭湧出一般。豈不與今日冬至同其亨泰也哉。况以此意而觀之一堂。則一堂上下無賢。

愚老少皆覺自率其性而自樂其常。一堂渾是春也。以此意而觀之一家。則一家內外無老幼親疎皆覺自率其性而自樂其常。一家渾是春也。又遠而觀之一郡。觀之一省。又遠而觀之天下萬世。無不渾然同樂同春。於無盡焉。却卽爲天下造太平。爲萬世開開太平。而無負父母生育一番。朝廷作養一場。適其在邇而非遠。事其在易而非難。昔人謂太平無象。却不想人人親其親。長其長。便是天下太平。萬世太平也。衆舉手加額曰。今日爲聖

天子稱贊太平自此其億萬世無疆也夫

沮海諸生講王者之民一章人之所不慮而知者一章君子有三樂一章既畢進講者而問之曰適講王伯伯不必言矣且汝以何爲王道耶對曰殺之不怨三句便是曰此是說王者氣象如面前日之光而非日之體樹之影而非樹之形也又對曰所過者化亦是曰此贊王者道大如說日光這等明樹影這等長去日體樹形更愈遠矣一生前曰孟子子會說以德行仁者王此却是直說王道矣羅子

曰、是則是矣、然又不知汝却以何爲德、以何爲仁也、對曰、若要直指、不只是人人親其親、長其長、而天下平也乎、羅子曰、汝旣知此、則何必遠取、卽次講二章書盡之矣、蓋以德行仁仁字、是王者必世而後仁的位字、樊是區家仁、一國興仁、堯舜帥天下以仁的仁字也、故上孝老、上長長、上恤孤、卽是王者之德、而民興孝、民興弟、民不悖、卽是王者以德而行仁也、故曰大人者不失其赤子之心、要之王道之大、亦不外乎孩提之良知良能而已、汝今

諸生說王道所過者化、所存者神也。纘思量其道如此渾化、如此神妙、畢竟有個來歷。如樹木然、必下地原是這樣果子、方纔末稍結成這樣果子、未有始初以荆棘種之、却忽然會長出個桃李來也。故天下之至妙至巧者、莫過於聖人之不思不勉、而至妙至巧者、亦莫過於孩提之不慮不學二者、大小雖殊、其神化則不差毫末也。况王者所過所存、直與上下同流、而孩提之所知所能、亦云達之天下、固未有不達之天下、而可謂與上下同流、亦

未有既達之天下。而不足與上下同流者也。以此二章合看。恰好渾是一章。但過化存神。是樹木末梢的果子。良知良能。是樹木根底的果子。根稍分得兩頭。果子通貫一脉。汝輩於今。却須猛省思量。人人皆做過孩提赤子來。人人皆知得愛敬親長來。何故堯舜孔孟。却能以這果子花實。溥海宇而同流合化。至後世諸人。却把這個果子枯芽敗種。而生意斬然。此中間却自有個緣故。蓋由古先賢賢生來。便會識得輕重。孔子吾十有五而志於學。



其時志學、便卽知歸重、孝弟慈也。志重於孝弟慈、則便一切外物、皆不能與他作對。生機貫徹、勃然克盛、絜矩從心、更不由他得矣。孟子窺見這個意思、又重重爲他發嘆、說君子有三樂、雖王天下、不與存也。夫一切外物之高、至於王天下處、便盡了。此王天下不與、則其他更何可言。是孟子極贊夫子志學之誠之極處。其實三樂最先一着、只是樂孝、樂弟、樂孝樂弟、到渾化時、便天壤之間、更無可代。以此反之於身、便自然無覺、無忤、而爲學不

厭矣。以此通之於人。便自然盡得英才。而爲教不  
倦矣。到得不厭不倦去處。則目前良知良能。渾然  
成個不思而得。不勉而中。一段滋味。其過不容以  
不化。其存不容以不神。其天地不容以不合德矣。  
故今日吾輩。旣生聖明之時。又幸得聞聖學之要。  
只在能辨別得個輕重。能決定得個趨向。果然如  
吾夫子當時志學。一付肝腸。則樹根之着地者。愈  
養而愈深。枝幹之參天者。將無疆而無盡。知能神  
化之果。不惟際上下而同圓。且將極古今而共久。

矣。願諸君其勉之。勉之。

羅子曰。大學一書。總括是明吾明德。其眼法。只在知止。知止則意之定。心之靜。身之安。國家天下之慮。不患其能得之難也。知止未能。而求定靜安慮。固不可得。以定靜安慮。與知止並論。亦於明德宗旨。相去遠甚。學何自而能大也耶。今日用力。須打將一切精神。於知止處透悟。卽所透次第。便分作定靜安慮。至了結處。卽謂之能得。而明明德於天下矣。知格工夫。渾淪圓妙。如眼法。尚眩幸汲汲先。

心也。

羅子曰：孟子形色天性重，重在一形字。孔子曰：仁者人也。又曰：道不遠人。孟子曰：萬物皆備于我，反身而誠，樂莫大焉。曰：我曰身，皆指形而言也。孟子因當時學者皆知天性爲道理之最妙、極神者，不知天性蘊落之處，皆知聖人爲人品之最高、極大者，不知聖人結果之地，故將吾人耳目手足之形重說一番。如云：此個耳目手足，其生色變化處，卽渾然是天下所謂最妙、極神的天性，故我此個

耳目手足之形一切世間賢人君子都辜負空過  
了。他惟有聖人之最高極大者。乃於此形之妙方  
爲率履不越也。如此便見得萬物皆備於我。我能  
誠於反身。卽其樂莫大焉者矣。仁德渾是個人。爲  
道而遠人。卽道不可以爲道矣。曰如何便不可以  
爲道。羅子曰。天命之謂性。率性之謂道也。學者言  
天。便見得甚大。若言人。便見得甚小。殊不知天人  
只是一個。如不一個。便不是道也。曰必是聖人方  
能代天言。身代天工。如何都說得一個。羅子曰。

經上明說天視自我民視。天聽自我民聽。如何不  
皆是一個聖人。但能知得天視卽民視。天聽卽民  
聽。而率循不失。便可以口代天言。身代天工。非別  
有伎倆也。故不肖嘗作一俚語。對朋友說。某於諸  
道學。則有未能。若說聖人。則若做過許久時也。朋  
友皆以某爲妄言。某引証孟子曰。大人者不失其  
赤子之心也。大人與天地合德。某固不敢當。至如  
赤子。我却不是做了許久來。耶邵康節詩云。耳目  
聰明。男子身。洪釣付與不爲貧。今日在會諸友。誰

不耳目聰明。誰不洪鈞付與。又誰不可承受付與。  
一個大聖人哉。衆皆忻然。

一貫編總論尾